

**ORHAN KOTAN**

BÎ SERBİLINDÎ

LÎ CÎHANÊ

DÎNÊRÎM

Werger: BEDÎRXAN EPÖZDEMÎR

yek bi yek, hezar bi hezar em dimirin  
bi kerb û germî, bê xem emê vezerin  
em dostan jî dijminan jî dinasin  
bila nekevin tengasîyê yê birîndar û ketî.

**bi serbilindî**

**li cîhanê**

**dinêrim**

Ji ber ku jana di dilê min da ji kêra serhildanê ye  
Ji ber ku ez herî ya xwe bi hêrs û bawerî tevdidim  
û bi ser xeman de  
û li ser karkerên rengavêtî de  
hêrsa serê çîyan belav dibe ji min.  
lewra ew rik a kubi agirê xwe min li ser lingan dihêle  
lewra ew şefeqa ku di çavên min de çirûsk vedide  
afîşên xwe nîşandanan  
pankertên mêrxas  
û bi hezaran milîtan  
ronahîya deryayên kûr  
beyanîyên dijwar  
rûyê asîman û lale  
wek kulmekê şidandî dikevîne jîyanê em.

lewra ew keça ku ez  
wek jîyanê  
wek gelê xwe jê hezdikim  
/ku wek gelê min  
nikare helbestên xwe binivîse,  
û stranên xwe bisitrê  
bi hezaran û bi hezaran tê gulebaran kirin  
li zîncîran hatîye xistî  
ji cengan ra hatîye şandî  
    ku wek gelê min bi bacan girêdayî  
ji bêkesî yên felçkirî ra berdan  
li nava janên giran û hêstirên çevan da hiştin  
helbestên minê yên ku wek kêrek dibirqin  
di stranên şoreşî da  
û lêvên wê yên ku serhildanê hîndikin  
bê ku carêkê bikaribim maç bikim  
carêk bî jî min  
bêtirs carêk be jî girtina destên wê  
yên veceniqî wek şev havînên sarîn  
heta stû û zendên lingên wê  
bê seqandin, bê seqandin, bê seqandin  
min dilê xwe da cenga navdar  
lewma dimeşime çîya yên aşîtî û azadî yê.

/ger mêrxasî bihedîne min  
ho parêzgerê  
qedexeyan  
bêbextîyan  
û rêbiran  
bibire dengê keçê min yên stranbêj  
û lawên min yên merxas,  
wek gor kolana xemgîn û bi hêrs  
wek tov reşandinê bi huner  
û bi mijandinên virt û vala  
û şopên  
birçîbûnê  
û zilmê  
wan destên min  
yên li tirpan û necaxan lefandî  
di kaşên kûr de kişandî  
li mawîzeran pêçandî  
li zincîran bixe ger dikarî.  
Ger tu ji vê ra jîyan bêjî  
ji jîyana wek ka û gîya re bêjî jîyan  
wek kûrmek li erdê dikişe  
dipelçiqe  
bêrûmetkirî  
mijandî  
bi re-zî-lî.

qelîşîna gulpikê  
nebîhîstina qîjîna zarokê nû bûyî  
gulgivînîya yarê  
singe wê yê lertzîn ku min têr maç nekir  
bi saw û tirs  
bi kerb û şewat  
her roj hîn ji kûrayve  
hinekê dîn bi histina mirina reş û tarî  
birçî û bê piştmerî  
wek segan gevzandinê ra  
ê bêjî jîyan e  
bila ev dil  
tirq û biteqê lo !

em werin ser tava biriqî  
ya gelên kedkar  
gelên merxas  
ku ax bi şehwetê dikişîne nava xwe  
nuha pir germe  
nuha nayê ragahandin  
ji fekîyên gihayî dagirtîne  
baxçeyên biharê ji cîhanê ra digêhîne.  
û jîyan li ser lêvên yarên gulgiwînî  
banga me dike ji bo ceng û evînî.  
ne ji bo ku kêr gihîştîye hestî  
tîr ji kevanê derketîye  
ji bo ku dawî were li selteneta bezirganî  
nemîne ev zordarî.

ji bo rojên ronahî  
di rêya cîhaneke nûh da  
rûmeta mêrxasîyê di rûyên wan da  
û hêza bîrewer ya cîhana tekoşer  
cîhana ku li dijî emperyalîzmê şerdike  
û xortên tekoşer ku biken dibezine  
mirinê  
bila ala wan ya sor pêl vede  
pêl vede, pêl vede  
ji bo ku dilê westyayî yê dîya min  
dilê ku bi rik va digevizî  
ronahî bibe.  
dîya min ya ku karesatan dîtîye  
diranên wê yên ketî di devê xemgîn da  
çevên wê yên bi hêstir  
ziravê wê  
û bêdawî  
û aramîya wê ku çîyan dihelîne,  
bi dilovanî.

ango bi rewşekê tevayî mirovatîya me  
ji bo ku xwe bişo, paqij bibe di kanîyên zelal da  
ji bo ku namusa xweydana enîyê rizgar bibe  
ji bo ku kilora germ azad bibe  
pîvaza tûj  
û basmeyên bi kulîlkan  
me sond xwar  
wefa kir  
sere xwe danî di vê rê yê da  
yê bimrin wê bimrin dostino  
dijminino heyy  
yên dimînin

...

..

.

1969-70

te bi kenên xwe yê nazenîn  
dîyarîdikin zarokên çev hêşîn  
sax nahêle min ev evîn  
sax nahêle wê bikûje min.

## Pêşmerge

zêr dizane  
zor dizane  
devê tifinga mor dizane !

çirûskan berhev dikim û zêde dibim  
ji ocaxên şewitî û şewtandî  
di zikê min da ji meydanên şer mahşerek  
ji hezar kulman qîyametek  
davêjin sitêrk yek biyek, cot û cot  
serhildan  
xencereke  
ji xwînê  
xwîn, ji polaye,  
vekirîye sirma çekan  
namus, rût û tazî li holêye.  
û azadî,  
ku gotina yekeme di pirtûkan da.  
sirma mawîzeran  
sirûda serxwebûnê diafrînê ji çîyan  
ala, li serê namluyan  
fitîlên dînamîdan di paşila wî da  
û kevirên heste di çengê wî da  
çirûskan berhev dike û zêde dibe.....

to vê ku min reşand bi xure-xur dibe axê  
gumîna gelên serîhildayî  
ji ocaxên şewitî û ruxandî çirûsk bilind dibin  
antenên min bi çeteyên bergirî  
yên ku bi bîbîlikên gelê min hatine rextkirin  
va tene girêdan  
û lewra malzaroyên bûkên min kef-kefe  
û bi hêvîya kuştinê qehir û jîyan  
di serda jî birçîbûn û darxaçî  
û birînêkê rip û reş:  
bê welatbûn  
ji bo vî ye derizîna zîndanan di rûyê min da  
ji bo vî ye ku wek gurmîneke esman jîyana min li çîyan.

tirs bi bêbextîyê ra dibe yek  
ez bi çeka xwe ra  
ango serxwebûn xewstî ya çeka mine.  
û sorbûna hesin di pizotê rijîyê da  
û bi qije qij şoreşa girdavan  
artêşekim ku bi qirçîn şîndibim  
ku ji gelên eşîr destanan tîne  
tekoşîna min  
ji bo êşên dilê serdemê ye.

13-15 çile 1970

**rehjena min  
di beyanîyeke  
şoreşê da**

di berbanga sibêda  
gumîna baregehên serhildara ye  
xonçe ji kûlîlk bûnê ra amade ye  
gava heval ji kozikan xwe rast dikin  
ku dilepîte cîhan  
û gel tev pişt didine hev  
tev digirim  
radhêjîme coşê bi himbêz kirinê  
di şaneyên min da erdhejînên volkanîk  
û di çirûskê çevên min da  
şitleke nûh, qure û dîlkêşe jîyan.

pencera xemê nîvalî dikim  
bi hêrs dikevime cîhanê  
diqirçe di bin giranî ya min da cîhana kevnar  
û pêşberê min derdikeve  
kavilên koşkan  
çîrokên eware dibêjin  
lê pora sipî ya dîya min gowah e  
gowaha mine bûka min ya ku li ser zarok çû  
û bi fatîhên gorên reş yên zarokan.

meriv dikarê merkûjîyên nermijî bîponije  
dikarê xwedê bîponije  
û mîrên bêhiş  
bide runiştandin di kûrayî ya wateyên mîhraban da  
lê sosret e nizanîm çima  
bêdawî ya esman wuha dûr  
sekna bereket bûna axê wuha hûr  
rêyên ku bi termên mihaciran tijîne  
birçîbûn  
û hêjarîya zayenda mirovatîyê.

sedem eve pişkafina mifrezeyan ji ordîgehên dagirker  
şahdemarên xwe girêdidin bi bergîrên gernas ra  
sedem eve li kolanên paytext  
bêtirs digerin tekoşêr  
û wek xençerek ji kalan keşandî diteyîse  
û ji min re ji birînên xwe yên bixwîn  
şoreşeke  
ku gihîştîye menzîla xwe  
di hemû demên rojê da.  
ey rûmeta cîhana gunehkar  
ez evîndarê te me.

**evîndarê**  
**te me**

ji kovana herîkîna avên har  
wek jineke ciwan dilerizê ax  
ji keşmekêşa gemara bajêr dûr  
ronahî û hêvî ya tazî  
te jîyan  
şerêkî yek bi yeke  
bêderew û bi mêrxasî.

te jîyan şerekî yek bi yeke  
li ser koletî û xwekuştinê çî heye  
di rawestina kombûna hêstirên çevan de  
him xewên xemgînî yên bûkan  
him xema çûyîna xerîbîyê yên mêran  
yanî xişim û rik  
yanî tirpana janê  
evên ku kerba wan hatîye gulebarankirin  
destên wan destbent kirî  
yên li ber kap  
ji zîndanên ku cîyên taybetî didine nasîn  
ber bi koşkên siltanên barbar  
inyat ji wan ra evên ku bi bêbextî li hev dixin  
bê vir û derew  
heya dawî bi mêrxasî  
te jîyan şerekî yek bi yeke.

ji çevên zarokên birçî  
ez bûme dilsojê te  
ez rehjanên xwe xwîn dikim û darbaz dibim ji axa te  
evîna te di dilê min da wek weşîyeke har diavêje  
hêrsê ji kalana wê tazîdikim.

ango dixwazim bêjim ku  
hilpekîn û sekna li dor min  
coşa cîhanê ye  
lewra rêça min ya  
ku ji şîna koletîyê tê  
wê destana serhildana birumet bilind bike.

coşa girseyên serhildayî  
wê şev bi te ronî bibe  
wê herîya sibê bi te bê li hev xistin  
evîndarim  
evîndarê te me  
berbanga ku ji singê pale hatîye pişkafîn.

## **Bang**

bi hêvîya ku kelijîn  
zarokên xwe yên nehs nexinqînê.

xemrevînî hemin hêsaye  
wek kilamêkê merxas li bajêr gerîn  
ji çîyan re destanan ponijîn hêsaye  
bi qajînekê kêfxweşî ketina zîndanan  
di singê candar yên keçanda, di çapxananda  
û cîhanê nû kirin di pêgirtinên komcivînanda  
hejandina li rûberê cîhanê hêsaye.  
lewra bayê serpêhatîya bi hezaran gernasan  
guleyek jî nîne ji namusa mawîzerê ra  
bi vekirî dîl î ji bo bêbextî ya dil  
qada cengê ya esil bêdenge heval  
bêxwedî ye  
gernasên mîsoger tiryakin, dilnermin.  
nexwe  
zilma ku di girdaba bajêr da tê keyan  
ne nîşana serildana gel ya bi nave û denge.  
her çiqas tu bi neynûkên xwe  
nivîsên bi xişim li ser dîwarên serdaba dikolî jî

belavokên ku hilweşîyane bûlwar  
xercbûna hewqas ked, hewqas bedel  
bilqandina xilte ya metal  
karanîna rotatîfan  
tiştêkê wek derzî kirina termene.  
û dem bêdeng çevdimiçkîne bi telaşî  
bi zûrîn herikîye û çûye  
ango ev  
dirameke rûreş e idî  
lewra  
ew zilamê ku kovanên vale dixwe cercura xwe  
bi kêmasî  
pêwîste ji xwe şerm bike  
ango dibême bese êdî  
kilamên xwe ji bo çîya yên min bêjin dibêjim  
destên xwe dirêjbikin dibêjim  
dirêjbikin  
em hev nasbikin  
helalbikin.

hinek caran bahoz û bager e  
hinek caran êşkence û zîndan  
wek guleyeke jengar di singê me da ye  
di nav dil de cîh dibe bê westan.

**li hemberî  
dost û dujminan**

ev stran sipardeya çîya yên mor in  
ji girtîyên revî ra çengek av  
şirtek stran ji yên hundir ra  
şarêkê çînî ye ji sindoqa cihêz ra  
ji çiçikan ra şîr  
û bereketa biharêye ji axê ra.

nasitire di nav şîna çar diwaranda, di nav têtên bi strîn de  
ev guleyeke dilêre di lûla mawîzerêda  
pêşî xela-şikîn, zemherî  
paşî revîya agirî  
belalûk  
û binefş e.

têlekî asurî lêdixe, yê dî keldanî  
û her demsal hêşîn e  
niftegonî  
soringa xwînî  
tehma wî ji xwêy ya lêvên qemerî  
li Ferat  
li Dijle dixe  
hê hey  
di nikulê baz da  
sûretê can e.  
porreşa min  
gulgwîna min  
evîna min  
ev stran  
siparde ya çîyayên mor in.

gava roj li rûyê seqimî dixê  
dilivê dilê asmanî  
şewqa wî bi keser  
îşlikê wî xwînî  
evîna wî kendalêke.  
çavên wî pingilêke  
çavên wî xencer  
çavên wî mêrxasî ye.  
keda wî kulîlka gîyadawûdî ye gula min  
destên wî dîlawer  
û bi huner.  
li pişt çiya yên mor  
sê destanên gewre  
sê cîhanên girs  
sê hevkêşe  
sê şifre  
sê dendikên atomê  
û hesteyek  
çirûskek  
û dînamîtek pê re.

ku roj li rûyê berf qemitî dixê  
strana çîyayên mor tê  
ew di singê tavê da agir  
li serzemînê kulîlkên nû bûn  
di namlûyêda fişeka namûsê  
di serhildanêda dil  
di xewa reşda  
rastîyên çîlspî bûn.  
nazenîna min  
evîna hezar salan  
li qeraxê tebatê da  
kefa rikê  
di sêva sorda  
di simbilanda  
hesrete di lêvên gul da.

...

..

.

can sivik be xwîşka mina nazenîn  
bê girîn  
bê reşgirêdan  
ji kêfa şevên desthineyê  
bi lorke, bi govend  
ji temiraxa  
tu stranên xwe bêje.

19-23 Berçile 1972

heya ku keran bihuner  
li hesinê sor bixe  
hêvî  
tu car tê neşikê.

pêwîste tu  
bi namlûyên  
ku berê xwe dane menzîla xwe  
temaşa cîhanê bikî  
wekî şoreşgerêkê  
ku di xwîna wî da bager digere  
wek biharekê bi bereket  
ku kulîlkan direşîne li dora xwe.

çemêkê boşî  
li çîyan-li giran  
tu ew xwînî ku rehên min germ dikî  
pêwîste tu  
bi namlû yên  
ku digêhjine armanca xwe  
li cîhanê biniherî birê min  
tu serhildana gelên dîl î.

tu serhildana gelên dîl î  
di armanca hevbeş ya bi hezaran qutûban da  
jîyana te  
xencerek  
tazî û pola ye  
hêvî  
qendîleke pîroz e li cem te  
û evîn  
aşitî  
û bereket  
dibare ji hunerên destên te.

hêrsa çeteyên çeksipartî  
kîna dilên milîtan  
û yê namûsê  
têkoşînê  
azadîyê  
    şitla azadîyê

mezin bibe wekî bihareke bi bereket  
kulîlkan li dora xwe bi reşîne.  
mezin bibe  
bila destên te dirêjê çeteyên kamboçî bibin  
bila ji bolîvya xwe bi mîtralyozan girê bidin û bîn  
li dilê bi agir yê rojhelata navîn bixin  
mezin bibe  
janên min yeko-yeko hilgire  
di rehîma gulên serhildanê da mezin bibe  
wek bihareke bi bereket  
kulîlkan li dora xwe bi reşîne.

...

..

.

24 çiriya pêşîn 1970  
12 çiriya paşîn 1972

ji libek genim  
hezar bereket tine  
hêvîya ku  
ji tetikê  
bi şhvet disilike  
memkê zindî yê jineke  
dimijî dimijî  
fişek di mawîzerê da har dibe  
û çavên te  
dojeha mayînêke peqandî ye  
dema çîya dilivin û xwe rast dikin  
av  
bi harî herikî  
gupik di serê çiqil de nehênîyek  
hogir ji kemîna cendirman difilitin :

destên spî movik-movik henedayî  
di xemile ji şînê şîneke nazenîn  
di morê de moreke dilevîn  
û destan  
ronî dibe ji berbangên belek  
birê min (.....)  
helbestên min dengên xwe direşînin li çîyan  
û bereketa xwe berhev dikin  
li Dîjle kefeke bi xwîn  
li Nemrûdê cemed  
û dilê çeteyî  
bêtirs  
kêrek biriqî ji pola  
çavên har yên eşkîyayek  
ji qerenfîl dilopêk.

Dema çîya dilivin û xwe rast dikin  
av  
bi harî herikî  
gupik di serê çiqil da nehênîyek  
hogir ji kemîna cendirman difilitin :  
hêvî.

hêvî  
memkê jinêkê zindî ye  
dimijî dimijî  
fişek di mawîzerê da har dibe  
û çavên te  
dojeha mayînêke peqandî ye  
hogir ji kemîna cendirman difilitin :

roj ji şaxên çilspî diqete û tê  
hêvîyê tevî evînê dike û tê  
dost çiqas kerb hene hiltînê û tê  
ji çîyayên morîn, silav dike karhezala min.

wek peyameke şifre nederxistî  
tê tu di nav çewan da bisekinî

helbestên  
adarê

derîyên şevê zêdeke  
nîzeyên tehdâyê  
êşê û xemgînîyê  
û xiyaretê zêdeke :  
êdî em dikarin xwe darazînin !

1. rêzik:

“li vê cîhanê mirin ne tişteke zor e  
ya herî zor damezrandine jîyanekê ye”  
mayakovskî

ev bêrî  
êşa koçberîyê ye  
tim demeke kevin tîne  
çûyîna bê vegere  
vegera bêdîtine.  
û aramî  
li çiqelê rikê gulpikeke soring  
wê biweşin mehên payîzê yên xemgîn  
bê goşt-bê nan, bê êzing  
roj tê xela-şikîn  
roj tê fîgan û zarîn  
wê biweşin çînên hêvîyê  
wê biweşin xewên sar yên girtûyan.  
roj tê meydanêkê xwepêşandinê ye  
roj tê  
em li çokê xwe dixin sond dixwin  
serê namlûyên me wê bibirqin  
roj tê wê di navenda meydanan da  
emê yeko-yeko bêne gulebaran kirin.

em ku baxçewanê hêvîyêne  
dil di çiqilê rikê da evîn diafrîne.  
em li qeraxê dîjle destana demîne  
bûkên ku di êşên bêdeng da parî-parî bûne  
û çawên wan  
li kemînan  
bi qaçaxçiyên ku wek fişne diqelişin  
ji bexçê yê gul cilmisî yê cîhanê  
ji dilgeşî ya zipzirav ya zarûkên ku nazên û dimirin  
dayîkên me yên ku şitlê gulan direşînin û derbaz dibin  
di nav destanê arîn û zarîn de tîn.

tovê ku di axê da bergirtîye  
ku biherike ber bi rûyê esman va  
ku dûkel ji qûşxana kelî bilind bibe  
gûpika xeydok ku li ser çiqil biqelişe  
û kûrê min yê di zikê jina min da  
diwarê rehîmê yê tenik bide ber refsan  
bigêhêje wê qajîna mezin  
bila bimeşê ji hezar salan virda  
lekeyên bi xwîn yên zulmê  
gewher  
bila bi reşayî ya rijîyê bêlêdan  
lewra dil  
li ber guleyên qatil  
bi vêketin û vemirin  
bi lêdan û ketinê delala min  
bi harbûn û hêrsbûn  
heta kêra rikê ya pola biçirûske  
bi seqanî-seqanî pê bibe û bizivire  
wê gûrî ya hêvîyê zêde bibe.

## 2. rêzik:

“faşizm bi hindikayî divê tekoşêrên bijare  
bi fizîkî ji holê rake. Armanc têkbirina vê  
listikê ye. «

vaye berbanga sibê ye ev  
cotêk çavên evînê  
çavên ku tavan mezin dikin  
di seqema beyanî da çîyan  
rûyê esmaneke xef pêdibe û disekine  
bê şefeq in  
disilike berbang  
li ber xwe dide şev  
birînek  
janek  
ji çîyan tê pirsek  
û hêrsê li çiqê rikê dielkînin  
ku bigêhje.

li ser pêwîstîyê tê rawestandî:

dojehek e  
ji çarika cîhanê ra  
divereşe darxaçên xwe  
diqelişin reyên tazî yên mejî  
neçar e  
dil tivilkî dipitpite  
hêvî  
li himber tifingên rekbar  
di nav kerîyê pîranha da  
wek caneke winda ye  
û pelendaran  
qûndaxan  
bombeyên gazê  
hezar û yek sal zîndan  
êşkence  
mirin:  
av bêdengin.

av bédengin oy  
çengek kesk di şaxên ciwanik da  
û serbanên biax bimij in  
xerîbek di tema kewê da ye  
taya bijehir ya xemgînîyê  
veqetinek  
xîzanîyek  
mirinek  
û gulrengînîyên jina mina ciwanik  
her diçe û reştir dibin.

Ji ber ku lûla çekan zengar e  
wek kulîlka pîvokeke xafî û narîn  
li pişt çîyayên mor  
keçên min yên bûk li pişt çîyayên mor  
bêdengin, bişînin keçên min yên bûk.

### 3. rêzik:

“bedelê têkşikanê canek nîne.”

ku te şitlên rizyayî yên xemgînîyê  
bi destên xwe mezin kiri bin  
li ser her şaşyek xêzêkê stûr dikşînî  
û pê li zengilê qirêj yê tunebûnê dikî  
xort bûyînî  
bê berpîrsîyarî  
nîxên xwe yên derzî pola derbazî stû yê xwe dikî  
li qehbetî ya rûyê dost yê faşîzmê dikenî  
şitlên ciwanik yên gel  
serhildan û rîka xwe  
bi bergirtinên hezar salan yên sekinî  
gûlpîka xwe ya ji pelên hevrişim  
ji tavê digurizînî  
“xwîşka dilê min ya porsor” ku lê ji hîvê dihezidim  
bi gotinek dertixime zemherîyê  
wek kêçekê bêhiş bi inyad  
wek çilpêyêkê gazîkirî yê mihîrvanî  
di xwekuştinên hişdarî yên dîn û har da  
te li bagera rehjena xwe xisti bî  
bi xiyalên rûyên bajêrvanî  
wek mawîzerêkê şikestî  
min bizane !

oy li min-li min bizane min  
tîrêjên tavê yên dawî li çîyan  
û li serbanê bi ax yê ocaxên ku hêvî divemirê  
di binê şikeftên windayî da  
ku di kemînê da disekine mirin  
bizane min.  
û tu min  
dostên min  
dostên min yên ku hatine gulebaran kirin  
di rehjena mirinêda cemdindina xwîna wan ya soring  
dijê tirsê  
bêbextîyê  
rûreşîyê  
ku wek dilopên şebnem dimeşe evîn  
di hinarika fişekan da ta-ta ye tevnepîrîk  
çavên te  
çavên te yên binefş-binefş  
qewirîne  
xizan  
bijan  
û di kûra rijîyê da  
ku kevokên spî têne xençer kirin  
bizane min  
oyy li min, oyy li min.

ben avêtine stûyê min  
kişandine heval  
di mejîyê min da falinç  
di dilê min da qansêr zêde dibî  
û ji tenêyîya hezin ya çîyayên şilopgirtî  
wek straneke xerîbîyê sekinîye jîyan.

#### 4. rêzik:

«hêvî ku carek ji hişkkirinê ra bê berdane  
wekî din zêde bûna gemara şeveke îdî.  
dilê gelan li wê disekinê. »

me stêrkên xwe lib lib ajote şevê  
ji ronahîyê rêyan raxist  
û ku dilop dilop dihelîyan stêrkên me  
ku ditefîya hêvî li ocaxên banbiax  
ku li êşeke bêdeng hezar singû bi hevra li me diketin  
me ji nûh va destpêkir bi tavê ra ber girt.

di vê demê da hinek hilweşîyan  
tirs  
wek mejîyekî rizyayî  
di serîyan da razayî  
hatin gulebaran kirin li serê çîyan  
ji zarokek bûyî ra bû xelat navên wan  
hatin ji bîr kirin  
lê tirsê wan ji bîr neçû.

...

..

.

westiya yê bajêr ji şeveke alkol yê zengar  
ji pirtûkê  
wek tevkujî ditirse ji şevên generalî  
ji îzgehan ra  
radaran ra  
nûçeyên ajansa ra  
û  
di malbêçî yên jinên wan da  
mastûrbasyona faşîzmê  
hilweşîyan ji xeyalên xwe yê burjûva.

îdî çîya çîrokeke bi êşîn  
û zanîngeh  
bermayî yê doza xwînê yê feodalekî  
bi girîn diçine gerdegê bûk  
nizanin kilaman bêjin zarok  
ji tûneyîya te  
çavên min wek tirbeyên ewlîya hezar salî...

## 5. rêzik:

« pêwîste meriv be bîr û bawer bî û gava meriv tîpa yekemîn  
ya têkoşînê binivsînê ; ku evîndarî be, hêvî be û ronahî be; me-  
riv bizane; ji xwînê, ji zilmê, ji mirinê xirabtir, wê êşên dijwar  
bên û li wê gorê gav bavêje. »

wê kîna çeteyan zêde bibe  
yek ji nurhakê  
yek ji Gilale wê bi hilkişê û bê  
stran dibin revîyek agir  
wek sêvê ji çiqil tê hilkirin  
wek ji dêmên gulîn yê yarê dikeve  
bi têlên sitrin yên zulmê tîn şidandin.

zarokên ku alan daçikînine stûna  
di komikên gola xwînê da destaneke dûrin  
zarokeke birçî digrî digrî bêsekin  
bûkek bi tilîya xwe rehîma xwe vedide  
dayîkek dikeve tenurê, diqele  
di îzgeyê da ziravî ya sazê, dabeşa neyê.

kîna çeteyan mezin dibe  
bajêr hêdî hêdî bêdeng dibe  
û rojên te bêçare derbaz dibin  
piştî keserekî ruxandî  
ji bedelê xwe dikeve ev cîhan.

ku kelebçe li destên te yê huluhulî dixin  
bê hêvîti diçike dil te dikoje  
û tirs  
birîneke bêbexte di hundir da dişixule  
xîyanet xencera xwe li rehjanê dixê  
tu yê bifroşî lawo  
tu yê bifroşî gulxonca xwe ya nebişkiwî.

28 Sibat/ 3 Adar 1973

## 6. rêzik:

« ku jihevketin destpêkir, tu yê li ber xwe bidî. »

tirsê bi êşê va kesixandin  
xortaniya xwe vereşîyan  
ji dilên ku bi hezar derdan hatibû badan  
evîn bi hezar û yek dojah hate daxkirin  
û bi kilaman  
li rûyê cîhanê xistin  
tirsê bi êşê va kesixandin  
bi bêdengî ya hemû lêvan  
gerdekê  
bi bêdengîya bergirtinê  
coşê  
hêvîyê  
û bêdengîya têkoşînê  
û di şevên ku singû dibû padîşah  
di girtîgehan û şaneyên êşkencê da  
êşê bi birînên nêş va şidandin  
laşên xwe yên ciwan vereşîyane jîyanê  
zmanê tirsê bi agir kesixandin.

pêwîste rehên nebzê îdî bê leke bavêjin  
bê derew, bê şerm û bê heyf lê hatin  
bi keys lê bixe ev dil.

## 7. rêzik:

«jevketin ji têkoşîna bêserûber ku teda û zordarî pê  
tê araste kirin dest pêdike, cîyê ku ji girsan ra tirs û  
qurf tê niçilandin.»

li qerexê kef bi xwîn ya rikê  
bi kînê hatîye seqandin ev dil  
yan dê biqelê û hişk bibe  
li navça çola lêxistî  
hatîye avêtin ji kûrayîya bîran ra  
bûye lêpok ji zordar ra.  
yan tê jehra xwe birjînî nava xwe  
har bibî di nav agir da.  
yan çevên se dilsoz û hêmin  
bi zarezarî  
û di stû da xiştên hesin...  
na dostino  
ev nîne  
çeka min  
evîna min  
hêvîya min  
dîlê bêra forseyek nîne.

li qerexê kef bi xwîn ya rikê  
bi kînê hatîye seqandin ev dil.

di xwişe xwişa beyanî yê rojên sayî da  
wek veşîyeke ku ji axê dipijiqe  
wek guleyek ku çikilîye armanca xwe  
wek xwînê  
wek jînê  
bi gumîna serketî ya têkoşînê.

**gotina nerêk ya  
dawîya vê helbestê**

îdî sekin û sekan tuneye birano  
li kêleka te termê evîndara delal  
li alîyê din têkoşereke gundî  
ji dûr karkerên dost têne gulebaran kirin  
û li rexê din yê cîhanê  
di çerxa bêbext ya çengek dolar da  
gelên gernas têne kerîkirin.

ev hesab  
hisaba ax û nan e  
zilm û zordarîyê ye  
bêrî û evîndarîyê ye  
îdî sekin û sekan tune birano  
bila biçîngê borî ya têkoşînê li şaxan.

Adar 73 Melezgirt  
Tebax 73 Enkere

II.

li nîverasta enîyê da  
jîyan lêdanêkê bi ezabe  
û qeder  
bênder ra  
êş û çilekeşîyê ye  
merxaşî li ser sifra zilmê da  
ragirtin jî  
berxwedan jî

paşeroj tê van wiha binivsînê.

paşeroj tê van wiha binivsîne

wê paqij bibin rojên berxwedanê  
paqij bibe têkoşîn  
dost jî, dijmin jî wê paqij bibin  
rûyê esman ji xwînê  
ji nêmê vê azad bibe  
li esman  
di avê da  
di axê da  
bi perenga pêşîn  
wê paqij bibe cîhan.

mildana zordarî yê zore  
hejarî yê  
mildana êşê  
dildarîya têkoşînê ku agir vedireşe  
wek fermaneke dardakirinê bi bela ye  
wek hêvîyeke dûr tenê ye.  
û wek mayîn raxistine  
hisap û kîsap dîtin  
bi çîyayên zincîrkirî ra  
piştî dost çiqas doste  
dijmin çiqas dijmine zanîn  
bagerê  
tofanê sing kirin  
têkneçûyîn  
neruxîn  
zore.  
li vê cîhana kepaze  
ku ji bûkên ciwan yên birçî ra kemîne  
û gore ji canên teze re  
ragirtin  
berxwedan  
û wek alayêkê şidyan  
li dijî zulm û zordarî yê  
bêbextî yê  
sekin  
zore.

zorîyeke din jî heye bêguman  
ku li ser nîverasta enîyê da  
xetma xîyanetê  
û di qêrîna singê te da  
tirs razayî bî  
rojên ronak xeyal kirin  
bi evînî  
zarokan maçê kirin ji dil û can  
û bikaribî  
bi serbilindî  
li cîhanê binêrî...

helbet tu yê kesî tawanbar nekî  
ku hêvî ji bîrên kor ra dîl bû  
bawerî hatibî zincîr kirî bi zîndanê ve  
wek kêreke kor bêmecal bî  
wek çekên vale bi şîn bin  
westîyayî bin  
ji koletî ya hezar salan  
wek peyameke şifre nederxistî  
we tu di nav çevan da bisekinî.

**hînare ji dostên  
têkoşêr ra**

ji bo cîhaneke nû birano  
ji bo çîhaneke nû ev têkoşîn  
ev zilm  
ev xwîn

ji bo cîhaneke nû birano  
ji bo cîhaneke nû ev tebat  
ev zûrîn  
ev inyat

## 2.

termên zarokên birçî û qehbikên piçûk  
demokrasî ya selexane li ber dîwaran dilerizê  
li kolanan parsekan da îxtîlal gutikên rebena li xwe dike  
û lewra fînans kapîtal bi şewqa xwe ya avzêrin ya kolonyal  
û bi rîhê xwe yê dirêj û spî  
pêwendîyên xwe bi meclîsên netewî va perçîn dike  
bi diranên har yê dolaran  
derbazî rehjanên çîyan dike.  
xwekujîyeke kevnar di kevçika dil da  
inyad li şoreşên hulhulî yên serhengên cuntayî  
û ji bo xatirê xatira yên artêşên dagirker  
hey çevê te bixwim demokrasî  
ya ser biqiloç  
ya kelemçe kirî jî.  
û esnafên lêpok  
û hemû hîlekar û bênamûs  
çiwîk danaynine ser têtên têtgrafan  
zîndanên tirsê runîştine li ser dilê teze  
û berhewa bûye kilama reş ya birçîbûnê  
li ser misulmanên xîzan yên pênc wextên selayê.

4.

vaye welatê min bûye cendera zulmê  
qulik û milik qesabxane  
erase gîyotîne.  
êvaran, di şûna nanda  
qehir tê ser sifran  
û bişev ne bi kulfetên xwe ra  
bi êş û xeman ra radizên insanên min  
fenekirine eşaîran ku cejn û seyranan kavêj dikin  
stran û awazên wan derewin  
derewe têkoşîna wan  
li milê dî yên çîyan  
piştan di tewînin  
ocaxan di şewtînin  
li vî milî  
şêlandin  
û talan.

xîyanet bi destên xwe yê hulhulî û bi dilê xwe yê kujyar  
di hewşên mizgeftan da darêxaçî datîne  
xortên gernas yê serxwebûnê  
di xwekujîyên mawîzeran da ne  
xalidê cibrî, seyît riza di xwekujîyên mawîzeran da ne.  
şikeftên dersimê stranêke heyvronîne  
bi kumzirxê xwe yê spî mîrê mîran îdî naqîre  
serkantî-komcivîn bêdengin, hulhulîne  
û bi fîyaqa xwe ya pêxas enîya neteweyî  
hinek marks hinek hîtler  
begên kurdan yên hatine serjê kirin  
di gorên xwe da tîna gulebaran kirin  
û di elfaba burjuwa da mistefa kemalek.

nîr li van çîyan  
bi navê biratîya gelan  
li stûyê stranên henedayî hate xistin  
di van çîyan da zikên jinên ducan hate qelaştin  
di van çîyan da serxwebûna rasteqîn hate serjê kirin.  
lê hê sar nebibûn lûleyên tifingan  
pêl li serên bi xwîn yên zarokan dikirin  
û rizgarxwazên netewî dimeşîyan  
rizgarxwazên netewî ji bo qirkirinên netewî.

...

..

.

...

nanê me tunebû  
berikê me tinebûn  
axa me ya ku  
me bi hezar canan  
hêvîyek diçand tune.  
lod bûn mirî wek çîyan  
û namûsa me li bin ligan.

...

lanet bûyî  
zar û zêç birçî  
jinên me, dewarên me.

...

ewên ku  
me kiloreke reş  
serîyek pîvaz bi hewra par dikir  
bi potînên korikkirî bi saqoyên xwe yê çermîn  
artêşên dagirker nebûn  
ew leşkerên kuvayê netewî bûn  
ku em li kêleka hev bêrê û resim hatibûn veşartin.

ji rewşê nizane  
qamçîyên bi xwîn yê zulma cendirman  
rê nade zîlana bi xwîn  
of off off lo  
li dû me alayî ya suwarî  
li ser me mîtralyoz dibarî.

7.

dosto mabesta van gotina yeko-yeko eve, ca ku  
tu bizani bî ketî nava têkoşîneke çawa.

tîfo û kansêr  
û hêtêş  
duşaxe  
têrnekirî ya dil, ûrkolî û wekî din  
û hemû zêndîyên zîyandar yê êşikan  
yek jî birçîbûn  
yek jî zulim  
di ser da jî zîndan.  
padîşahê xweza vizîneke تنها ye  
şitil lawazin  
li çîyan sancîya hêvîyê bi kovan  
tov di nav axê da bi xwîn û rewan.  
û stranên me bi xwîn û rewanin :

«zivistane gul nabişkivin  
li ser çiqla bilbil naxwînin  
dil dixwaze dest nagêhjê  
waxx limin  
birîndarim  
ji hundir  
ji hundir yar ji hundir  
jêke dilê min yar ji hundir »  
aha namûs  
ji kerba xwekuştinê diponije  
û ev kesera beroşa vale ku xelas nabe  
fedî dike ji xwe bi xwe  
axa ku serbiser nade  
cot  
û gayê pîr.  
zarokên  
birçî-tên  
neçûn  
ne bendewar hene  
û li çîyan  
fîrarên tiptazî.

**destana**  
**nehri**

berxê nêr  
bona kêr

alîyeke min erz-î mîrî  
yê dîn xeracîye ye  
zîndana ku ez tê da dirizim  
şitildanka gelan e.

ew axa ku ez tê da hatime veşartin  
zevîya hezar salan  
li her cihê  
bi evîndarî hatîye ajotin  
ku di weşîyên xwe da hezar û yek kulîlk tîne  
û kulîlkên  
çiwîkan...  
bi çavên xwe yên şilopîn  
zarokên eşîra  
bi zincîran  
di kemînan da nayên girtin  
di kilaman da têne gotin.  
di hunerên destên min da  
dilê wî dirgan ciwan  
her alî  
bi evînî hatîye lihevexistin  
fatîhayêke hinekirî ye  
qajîna zêrin ya zarokê nû bûyî.

ew çîya yê ku ez li ser nedarapim  
an şeve  
an zulme  
an koletî.

Ji dojhê xwe bi kerbê dipêçin û tên  
di taca serê wan ya bi xwîn da berbanga zincîrkirî  
avêtina zereqa tavê hulhulî ye  
û qereqolên sînor  
ji termên qaçaxçîyane.  
Ji bo gelên koçber xeme  
kerbe.  
Ji begên eşîran ra xwekuştin  
Ji bûkên rûken ra kesere.  
kesere delala min  
kesere belakira min  
kesere dilmayî  
bêçare  
bêdeng  
kesere:  
xencera kurda ya ser qewsokî  
destikê xwe ji dara gilyazî  
pola yê wê çil roj û çil şev  
heta hestiyar hatîye avdan  
aqil ji zanayan  
ji mezinan bîrewerî daye hev  
û ji jinên eşîran dilsozî  
ji destanan mêrxasî hilanî ye.  
zman yê urarto  
destên wî li turuşpa simbil simbil vedibin.  
ew çîya yê ku ez li ser nedarapim  
xemkêşî ye  
uşûr e  
û kelebçe ye.

helbet  
wê gul vebe  
wê dengê me fêkî yê xwe bide  
wê bêjin di stranek de me.  
ku tav lê dixê vedibe  
ku zilim lê dixê dikeve  
ku benê me hatîye kişandin  
sedem  
/hukumeta bêşeref û zorker  
ji mehabadê  
heya rewandûzê  
heya cizîrê  
ben avêtî ye  
û kînê hûrandî ye.

axa ku ez jê şîn bûme  
ji serhildana gelane  
ji min ra dibêjin şêx ubeydilahê nehrî  
xwîna min  
ji avên kurdistanê ye.  
bi êş û azar e  
bêçare ye  
westa  
û birîndar e.

û spîka çevên min  
xwîn diniquînê şevê  
û destên min qurmiçîne  
şel bûne.  
axa min bêvaç  
kulîlka min dilketî  
di dilê min da  
di nava dilê min da  
guleyêke xayîne koletî.  
ne dûmeqesk difire  
ne beytik dikeve  
tenê paşayên osmanî  
dîwan saz dikin  
darêzgerî dikin  
yek jî  
siltanên sefavî yên destbixwîn  
mora min dielqînin li ser sêpikê  
silav dikim li gelê xwe  
bila serî daneyne  
kemberbest nebe.

simbilê ku ez jê qelişîm  
ji keda gelane

girê ya dilê min vedibe  
an ji zîndanê  
an jî ji zulmê têm.

van destên min bigre di agirde biqelîne  
gul  
û gûpika min di şevêde birizîne  
zor û eza  
pêwîstkirinê bîne:  
gûpika ku di serê çiqil da vebûye  
bila di pencera min da neqerise  
keçên min  
hêyy canê min  
keçên min yên bûk  
sedem ku  
di zulim û zîndanê da ber bigrin ji min  
di tayê dane.

ev çîya yê ku ez li ser nedarapim  
an zulme  
an uşûre  
an koletî.

ji min ra dibêjin ubeydilahê nehrî  
alîyê minê yekem jandar e  
yê duhem mêrkûjî  
alîyê minê sîyem zîndan e  
teda ye.  
aqil û hiş nagêhjê alîyê minê çarem  
çev dibîne  
zman nabêje.  
kedera dergûşa mine alîyê minê pêncem  
dojehêke alîyê minê şeşem.  
hêvî ye  
dildarî ye alîyê minê heftem  
nayê zanîn alîyê minê heştem  
nehem alîyê min ji koletîyê  
yê dehem ji xîyanetê ye.

rêya ku ez lê dimeşim  
li dîjle kef bi kefe  
li ferat med e, cezîr e.

û dilê kesk yê mezbota  
bi kutana hesin  
bi qewartina mermer  
bi qulkirin û derketin ji diwar  
ji bereketa biharê  
ji domandina zîldanê ye.  
ne payîz tê serê belgê  
ne zivistan rehên zman digre  
ew zindana ku ez tê da dirizim  
şitildanka gelane.

**di şûna  
dawî da**

bêgemare-bêzengare, xwerû û zelale dilê me  
ji bênamûsan ra xencereke bixwîn e gotina me  
pir dûre dostino rêya me  
hezar silav li yê ketî û têkoşêran re.

tirmeh-tebax 74 enkere

## **fetlok**

ji rûyê ku êş lê tê ditirsim  
ji diltepîna ku tirs pê hatîye hesikîn  
alava ku çirûskan xistîye çevên min  
ji ber girtina bêbextîya merdîyê ye

nemerdî ya zilmê xema min nîne  
şewatên napalim ji derve yê xema min in  
birîn bibine qanser biseknin jî  
qet disekine fişeka ku di lûlê da biteqe

kerba agirpij ji dil hilîne  
heya dawî kela xwe birijîne  
razan ji mirinê ra merheba dane  
bêdengî

xwekuştine

derbaz bû û derket ev dil ji gelek teşqelan  
wê hêj sing bide gelean  
binamûs bûn êdî têrê nake  
li kevirê mehenga namûsê lêxistin gereke.

Jîyana wek helbestêkê milîtan hîn xweştir e.\*

Gelek dostên min gava min dibînin, qala helbesta dikan. Bi taybetî jî pirsar “ gelo tu helbest dinivîsî?” jî min dikan.

Dirêj –li gor temena mirovan- di nav qetên demên dirêj de carna tiştina dinivîsim. Ew, gelek caran , bitenê, bîr û bawerîyên kesîf in. Bê guman ev ne ew helbesta ku ez lê difikirim, dijîm û êşên bê dawî dide min û min dixê heyecanê ne, ango ew ne helbesta jîyanê ne.

Ev demêke ku wekî neferekî tekoşîna netewî û civakî ya welatê xwe, ez hewl didim, erkên xwe bi cîh bînim. Di vê merhelê da, her çalakî, her tewr, her bîr û bawerîya metînî, jî min ra wekî perçeyên destaneke mezin tê.

Demêke dirêj e, di fabrîke, zevî, xwendegêh, gundên çîyê û seranserê sînoran de, bi sedan milîtanên ku bi girseyên gel ve bûne yek, mil bi mil, destaneke pîroz dinivîsin û dijîn. Di vê wateyê de, di nav pîvanên ku tê zanîn de, helbest nivîsîn bêguman tiştêkî xweş e. Lê jîyana wek helbestêke milîtan hîn xweştir e.

Di gel êşên mezin û bi xwîn, destana comerdî û fedekarîyên bê hempa tê jîyîn. Û ev yeka wê bê nivisandin jî.

\*( Orhan Kotan, nîsan 1983, Stockholm jî pêşgotina pirtûka sêyemîn a Orhan Kotan ya bi navê « Sanci » (Qolinc).

« ziman hîmê hebûna neteweyekî ye... » \*

**.Tu dikarî, ji kerema xwe, hinêkî behsa xwe û jîyana xwe bikî ?**

..Sala ji dayîk bûna min 1944 e. Ez zarokê duwemîn yê malê me. Min xwendina xwe heta lîseyê, li Kurdistanê, li Muş, Seêrt, Erzurumê kir. Min li Enqerê dest bi xwendina unîwersîtê « Dil Tarih Coğrafya Fakültesi » (Fakulta Ziman Dîrok û Êrdnasîyê) kir. Destpêka xebata min a sîyasî ji hingê ye. Ew sal, salên dijwar û zehmet bûn. Hingê kapîtalîzm li Tirkîyê bi pêş diket.

Di destpêka 1960-an de ordîya Tirkîyê dest da ser hukim û jîyana sîyasî pir germ bû. Xort dimeşîn, tiştinê protesto dikirin û tiştina diparastin. Tevera xort û xwendevanan ku ez jî tê de bûm bênaverok û hedef bû. Hingê mesela kurd û doza kurdan jî bi pêş diket. Di 1959-an de 49 ronakbîrên kurd hatin girtin. Di rojname û kovaran da behsa kurdan dibû, rojname û kovar bi kurdî derdiketin. Lê ez û nifşê me, em li derveyî vê pêşketinê bûn. Ez ji teverga sîyasî betir, di nav xebateke edebî de bûm.

Di dawîya 1960-an de, xort û xwendevanên kurdan li bajarên mezin yên Tirkîyê û li Kurdistanê komeleyeke kurdî « Devrimci Doğu Kültür Ocakları » (Komelên Şoreşger û Çandî yên Rojhilatê) vebû. Vê komelê pir alîkarî li pêşketinê kir. Di destpêka 1970 de ordî careke dîn hate ser hukim û welatparêz û şoreşger hatin girtin. Welatparêz û şoreşgerên kurdan li hember dadgehên eskerî, li Dîyarbekirê, xwe, tekoşîna xwe, welat û tarîxa welatê xwe parastin. Vê parastinê alîkarî li min hevalên din kir ku em hîn çetir û kûrtir mesela xwe, doza Kurdistanê têbigihên. Lê di eynî wext de, wê parastinê kêmanîyên me, di ware ziman, tarîx, çand, sîyaset û edebîyata kurdi de, nîşanî me da. Mesela zimanê kurdî, giringîya bikaranîna zimanê kurdî, bi her awayî, derket pêş. Ji lewre di 1975-an de, me weşanxana « komalê » li Enqerê vekir. Ez xwedî û gerînendeyê weşanxanê bûm. Tevî min gelek kesên din, nivîskar, xwendevan, mele, gundî, karker û hwd. Di avakirina “komalê” de hebûn.

“komal” bû gaveke hêja. Me bi qasî 20 kitêp li ser Kurd û Kurdistanê weşandin. Û paşê, gava RIZGARÎ di 1976 a de dest bi weşînê kir, min bi her awayî alîkarî lê kir. ‘Rizgarî’ berdewama “Komalê” bû. Vê demê, dema ‘Komal û Rizgarîyê’ di warê hişyarbûn, pêşketin û ji xwe vegeerînê de, pir alîkarî li kurdan kir. Û paşê jîyana sirgûnîyê, penahendîyê dest pê kir, di sala 1980-an de.

### **.Te çawan dest bi edebîyatê kir? Jîyana te ya edebî?**

..Hê di zarokatîya xwe de, ez rastî edebiyatê hatim. Di cejnên de, min, şîr di xwendin. Di lîsê de min di rojnama xwendevanan de tiştine nivîsîn. Li uniwersîtê min existensiyalîzm nas kir. Hingê ez di bin tesîra şîr û edebîyata tirkî de bûm. Min kitêba xwe ya şîran ya yekemîn “Boyunduruk”(Nîr) di sala 1964 an de weşand. Piştî wê, demeke dirêj, min şîr neweşandin.

Jîyan aktîf bû û ez diguherîm. Ji xwe, gava min mesela kurdî hin çetir nasî, dîtînen min ên edebî jî çelqiyên û guherîn.

Kitêba duwemîn ya şîran, “Gururla Bakıyorum Dünyaya”(Ez bi serbilindî li dinê dinihêrim) di sala 1976 an de derket. Paşê xebatên sîyasî rê li xebata edebî girt. Niha jî, ji bo min, xebata sîyasî li pêş e. Şîr ji bo min jîyan e. Jîyana min jî niha digel nexweşîya min, sîyasî ye. Min şîrên xwe yê herî baş di navbera 1969-1974 an de nivîsîn. Wê gavê tevger xurt bû, zordarî pir bû, liberxwedan geş bû. Şîrên min yê wê demê encama jîyan û xebata min bû.

Li derveyî welet jî min kitêbeke şîran weşand. Li derveyî welet nexweşîyeke xedar kete pêsîra min, ez ji mirinê xelas bûm. Hingê min şîr ne nivîsîn û tevî kiteba min “Sancî”(Qolinc) ew weşandin.

Lê ez divê bibêjim ku dîtina min ya edebî, berî 15-20 salan, guherî. Hingê ez hîn çetir hîn bûm ku ez kurd im û asîmile bûme. Ez bi tirkî dinivîsim, ji ber ku ez asîmile bûme. Zimanê min yê ronakbîrî zimanekî din e. Min hemû xwendina xwe bi zimanê tirkî kir. Meriv 20-25 sal bi tirkî dixwîne. Kurdî qedexe ye. Gava meriv têdigihê ku meriv kurd e, hingê divê mesela zanîbûnê, ji nû ve, dest pê dike. Hingê divê meriv kurdbûnê bi her awayî bizanibe. Wê çaxê meriv têdigihê ku heta wê gavê meriv bi zimanê neteweyekî din nivîsîye û ji gelê xwe dûr bûye. Meriv dikare derdê gelê kurd bi xwe re nikare zêde tişt bide. Ji ber ku zimanê gelê kurd, kurdî ye. Meriv nikare zanîne

biguhezîne gelê kurd. Şiîr bi zimanekî tê nivîsîn. Wergerandina şîrê pir zehmet e. Şiîr ne wekî çîrok, kurte-çîrok, romanê ye. Piştî ku ez hatim derveyî welêt min mesele hîn çetir, firehtir, kûrtir fahm kir.

**.Niha tiştêkî berbiçav li meydanê ye. Li her perçê Kurdistanê ev tişt xwuya dike. Li Tirkîyê hin bêtir. Gelek kurd ne bi zimanê xwe, lê bi zimanê neteweyekî din dinivîsîn. Rewşa te jî weha ye. Tiştê ku tu li serê dinivîsî û tiştên ku alîkarî li nivîsîna te dikin, Kurd û Kurdistan e. Em dê çawan li nivîskar, hunermend û ronakbîrên kurd ku di vê rewşê de ne, binihêrin, wan çawan bisînifînin?**

.. Du aliyên vê meselê hene; aliyê çandî û aliyê sîyasî. Îro, aliyê sîyasî, hin bêtir, li pêş e. Ji ber zordariyê li her çar dewletan jî kurdî li pey tirkî, erebî û farisî tê. Ma ronakbîrê kurd çi bike, çî alternatîfên wî hene? Heta ew mezin dibe dixwîne û bi kurdîya xwe dihesê, ew asîmîle (ji aliyê ziman) dibe. Ji aliyê têgihiştina ronakbîrî, mixabin zimanê ronakbîrî tirkî, farisî û erebî ye. Gava ronakbîrên kurd baş bi kurdîya xwe dihesin, hingê ew li xwe vedigerin. Ronakbîrê kurd ji bêgaviyê, bi zimanekî din li xelkê xwe vedigere. Ji lewra zimanê kurdî dibe zimanê peyvînê.

Pêşvexistina zimanê kurdî jî, dîsan, bi xebata sîyasî girêdayî ye. Hemû ronakbîrên kurd bi kurdî binivîsin jî, hawilekî mezin dê bi dest nekeve. Hemû rojname û kovarên Kurdistanê Tirkîyê bi tirkî ne. Xelk bi tirkî bêhtir fêhm dike. Zanîn bi tirkî diguheze xelkê. Gava Kurdistan rizgar be, nifşekî- du nifş pê perwerde bibe, hingê kurdî dikare li cihê rûne. Li Kurdistanê Tirkîyê her tişt bi tirkî tê afirandin. Ronakbîrên tebîî (feqê, mele, seyda, dengbêj) ku di nav xelkê de dijîn, kurdî diparêzin. Ji ber rewşa dijwar, digel ku du sed-sê sed sal derbas bûye, hê jî esereke nû nikaribûye *Mem û Zîn* a Ehmedê Xanê derbas bike.

Şert û merc xirab in. Ronakbîr û nivîskarên herî mezin yê Tirkîyê Kurd in. Ew her tiştê xwe ji kurd û Kurdistanê werdigrin. Gelekî wan vê yekê înkâr dikin û xwe wekî Tirk dibînin. Ev awir tiştêkî xirap û pir bi xeter e. Beşekî ji wan jî bêdeng dimînin û tiştêkî nabêjin. Wekî Yaşar Kemal. Ew her tiştê xwe, bi her awayî, ji Kurdistanê werdigire. Lê ew xwe wekî nivîskarekî Kurd nade nasîn û bêdeng dimîne. Ew dizane ku gava ew wekî nivîskarekî Kurd derkeve meydanê, ewê li

Tirkîyê pir tişt wunda bike û dewletê li wî vegere. Ehmed Arif hîn çetir e. Ew xwe înkâr nake. Gerçê ew ne di nav tevgera kurdî de ye û bi aktîvî naxebite. Lê ew xwe wekî şaîrekî Kurd dibîne û pê serfiraz dibe.

Kesên wekî Yaşar Kemal pir in. Meriv nikare wan bi xayîntî bi nav bike, lê dil dixwaze ku ew jî alîkarî tevgera kurdî bikin.

### **. Baş e, tu, wekî nivîskarekî sirgûniyê çawan dibînî ? Çawan dijî ?**

.. Sirgûnî trajedîya sedsala me ye. Sirgûnî ecêp nexweş û neşêrîn e, tiştêkî hov û weşî ye. Meriv ji xwe, ji welat û gelê xwe, ji çand û zimanê xwe bi dûr dikeve. Sirgûnî jîyan û pîvanê merivan diguherîne û wan ji hev dixîne. Sirgûnî êş û jan e. Meriv nikare wekî berê bikêr û xebatkar be.

Bi bawerîya min, meriv divê li dijî xirabî û nexweşîyên xeribîyê şer bike, her tiştê bike çekê şer û xebatê. Edebîyat dikare roleke mezin bilîze. Ji xwe sirgûnî qedera kurdan e. Li welet jî, gava me ji Milazgirê bar kir û em çûn Enqerê hingê ew jî sirgûnî bû.

### **.Gerçê tu bî kurdî nanivîsî lê bala te li ser edebîyata kurdî ye. Bi qasî ku tu dibînî, rewşa ziman û edebîyata kurdî çawane?**

..Li Ewropayê, di wî warî de xebatekî xweş û hêja heye û ev xebat hêvî dide merivan. Gerçê ev xebata hê jî bi kesan dimeşe. Li Ewropayê du akademî û enstîtûyên Kurdan hene. Lê hê jî berhemên wan xwuya nakin. Pêşketineke baş heye. Lê terî nake. Divê Kurd sewiya zanîne bilind bikin. Ev jî bi dezgah û rêxistinên dibe. Gelek kar û xebat divê bête kirin.

Li derveyê welêt pêşketin baş e. Lê li Kurdistana Tirkîyê xirab e. Li wir tirkî bûye serdest. Herkes bi tirkî dipeyîve û dinivîse. Gelek tişt ji girtîgehên Tirkîyê ji me re tên, ew hemû bi tirkî ne. Xeter di vir de ye. Xwezî niha sînema kurdî hebûya. Tesîra sînema li ser xelkê gelek e. Ger sînema hebûya, wê alîkarî pêşketina zimanê kurdî bikira... Mesela *Zimanê Çîyan* li Tirkîyê, bi tirkî ji aliyê kurdan tê lîstin.

### **. Wekî şaîr û ronakbîrekî kurd, ji bo rojên bê, çî plan û xebatên te hene ?**

.. Ji bilî kar û barên Kurdistan Pressê, ez niha, ji şîr û edebîyatê bêtir, li ser tarîxê difikirim û dixebitim. Ev bûn 20 sal ku ez li ser tarîxê hûr dibim. Xebatên li ser ziman, edebîyat, çand pir girîng in. Nemaze ziman. Gava neteweyekî zimanê xwe winda bike, ew huwîyeta xwe ya neteweyî jî winda dike. Lê ji bo ku ev xebat baş bimeşin û bikêr bin, divê meriv li ser tarîxa xwe xwedîyê bîr û bawerîyeke rast û kûr be. Niha rewşa min a sihhî (tenduristî) pir xirab e. Ez biqasî deh caran ketime bin kêra doktoran. Eger rewşa min hinekî baş be, ez dixwazim wekî projeyeke dirêj, li ser tarîxa nûjen a Kurdistanê, 1806-1976, bixebitim û binivîsim. Ev wext û dem tarîxa Kurdistanê de, bi bawerîya min pir girîng e. Wekî kurdekî, ez dixwazim vê wextê binivîsim. Di warê edebîyatê de jî, ez bi hêvî û heyecan im. Lê rewşa min û rewşa sirgûnîyê rê nade ez binivîsim.

\*(Kurdistan Press-26 sibat/1990  
rûpel/14 hevpeyîvîn a Mehmed  
Uzun bi Orhan Kotan re.)

## PÊŞGOTÎN

Bedirxan Epözdemir

Navê Orhan Kotan, ji xwendevanên Kurd û Tirk ra ne xerîbe. Xwendevan, Orhan Kotan wek sîyasetmedar, rojnamevan, nivîskar û helbestvan nas dikin. Ewî, heya dawîya temena xwe di van waranda bê westan xebat kir. Ez bawerim ku bi kirinên xwe wê Orhan Kotan di dîroka gel da cîhê xwe bigre. Bêguman bi stîl, zman û naveroka berhemên xwe, wê Orhan Kotan bibe babeta lokolînê ji bo lêkolînvana.

Armanca vê pêşgotinê, dût û dirêj li ser jîyan û xebata Orhan rawestin nîne. Ev babeteke dîye. Divê bêalî em temaşa jîyan û xebata rewşenbîran û her wuha ya Orhan Kotan bikin. Pêwîste rexne bi zanistî rola xwe ya payebilind bileyze. Di zanistîyê da cîhê reşkirin û metihkirinê tune ye.

Min, Orhan di dawîya salên şêstan da naskir. Di gelek waran da bîr û bawerîyên me cuda bûn. Aloziyên salên heftîyan pir dijwar bûn. Bi navê îdeolojî û sîyasetê kambaxîya wan salan nayêne jibîrkin. Sedem wî min û Orhan jî hev gelek êşand. Me ji hev hiz jî kir û em li hev qehirin jî. Dostanîya me heya dawîya temena wî bi rengeke vekirî û bi prensib meşîya. Ligel cuda bûna, gelek tişt li gel Orhan hebûn ku meriv îro jî dikare wek nimûne wan biparêzê. Bêtirs bû, arşîwvaneke bê hempa bû, bi disîplîn û bi inyard bû.

Sedem ku nikarîya bi kurdî bixwîne û binivîsîne gelek xemgîn bû. Dema li jîyanê bû çend caran pêşniyar kir ku ez helbestên wî wergerî-nime kurdî. Piştî çû heqîya xwe xanima wî ya hêja Mehtap va ku ez wê wesîyeta wî bicîh binim. Min jî vî deyneke wefayê zanî, pirtûka wî ya bi navê “Gururla Bakiyorum Dünyaya” ( Bi serbilindî li cîhanê dinerim) wergerande kurdî. Ev werger li ber çapa çaran ya pirtûkê ku ji aliyê Çiviyazıları va hatibû weşandin pêk hat. Cîyê mixabê ye ku dema çapa çar pêk hat, Orhan piştî çend rojk çû dilovanîya xwe û çapa nûh nedît. Heya nûha sê pirtûken helbestan yê Orhan Kotan bi tirkî hatine weşandin; Boyunduruk (Nîr) 1964 li Enkerê, Gururla Bakiyorum Dünyaya ( Bi Serbilindî li Cîhanê Dinêhrim) 1975 li Enkerê û Sancî (Qolinc) 1984 li Stockholm . Herdû pirtûkên dî jî di

destê min da ne, ku mecal hebe ezê wana jê bixime xizmeta xwendevanan.

Qasî du sal ez li ser wergera vê pirtûkê xebitim. Min xwest ku bêqisûr xwendevanên kurd bigêhjine tema helbestên Orhan Kotan. Ez, bi xwe piştî wergerê bi tevayî ghiştime vê temê. Di encamê da min dît ku Orhan, helbestbêjê dîrokçe ya me ye.

Bêguman, werger tişteke hêsa nîne. Ku ev werger helbest be û bi taybetî imza yê Orhan Kotan li binê be barê meriv girantir, dibe. Şik tûneye kêmasîyê min jê hene. Hêvîdarim xwendevan min bibexşînin. Ku ez piçek be jê tema helbestên Orhan Kotan bidime xwendevanan, ez xwe bextîyar bizanim.

Pir spas, ji dost û hevalan ra ku di derheqê wergera vê pirtûkê da dîtin, arîkarî û pêşniyarên xwe ji min ra texsîrnekirin. Ji ber vê yekê ez careke din ji kûrayî ya dil Orhan yad dikim. 03.07.2001

**Têbinî** ; Em gelek spas dikin li Kek Bedirxan Epözdemir ra ku ji bo destur bidin wê berhemê tîn weşankirin.

**[www.gelawej.org/orhan-kotan/](http://www.gelawej.org/orhan-kotan/)**